

SUURAT AN-NABA:

*Magaca Eebe yaan ku bilaabaynaa ee Naxariis guud
iyo mid gaaraba Naxariista.*

- 1. Maxay iska waydiinayaan (Gaaladu)*
- 2. Warkii waynaa xaggiisa (Qiyaamada ama Quraanka)*
- 3. Ay isku diiddanaayeen*
- 4. Saas ma aha ee way ogaan doonaan*
- 5. Haddana way ogaandoonaan (waxa ku dhaca)*
- 6. Miyaannaan Dhulka gogol ka yeelin*
- 7. Buurahana Rukummo (ka yeelin)*
- 8. Miyannaan idinka Abuurina Noocyo*
- 9. Miyaannaan Hurdada Raaxo idiinka dhigin*
- 10. Miyaannaan Habeeka asturaal idiinka dhigin*
- 11. Miyaannaan Maalinta waqti shaqo idiinka dhigin*
- 12. Korkiinna miyaannaan ka dhisin Toodoba xoog leh*
- 13. Miyaannaan dhexdeeda yeelin Siraad aad u ifi (Qorraxda)*

Sharaxda Suurrada (1)

Aayadahani waxay caddayn canaanta ku dhici kuwa Quraanka, Qiyaamada iyo Xaqa shakiya, Eebe wuu u goodiyay, maxaa yeelay nicmooyinkiisa yay u jeedaan, sida Dhulka, Buuraha, Abuurka, Hurdada raaxada ah, Habeenka, Maalinta ,Cirka iyo Iftiinka Eebe inoo yeelay, Eebaha ahaysiiyay waxyaalahaas iyo Nicmooyin kale oo badanba ma mudna in laga gaaloobo, ee wuxuu mudan yahay rumayn iyo addeecid.

- 14. Waxaan idiinka soodajinnay daruuraha biyo badan**
- 15. Si aan ugu soo bixinno Midho iyo Daaq**
- 16. Iyo Beero Kulansan (badan)**
- 17. Maalinta Kalabuxu waxay leedahay waqti go'an**
- 18. Waana Maalinta Suurka la afuufi ood u imanaysaan Kooxo**
- 19. Samadana waa la furi waxayna yeelan Albaabo**
- 20. Buurahana waa la kaxayn waxayna noqon Dhalanteed**
- 21. Naarta Jahannamana waxay u darbantahay**
- 22. (Gaalada) Xadgudbay meelay u noqdaan**
- 23. Waxayna ku nagaan Dhexdeeda Sanooyin**
- 24. Mana ku dhadhamiyaan dhexdeeda qabaw (ama Hurdo) ama cabbid midna**
- 25. Waxaan ahayn biyo kulul iyo Dhacaanka (ehlu Naarka)**
- 26. Waxaana lagu abaalmariyay si waafaqsan Camalkoodii**
- 27. Waxayna ahaayeen kuwa aan ka yaabaynin xisaab**

Sharaxda Suurrada (2)

Deeqda Eebe waxay mudantahay in lugu mahadiyo, maxaa yeelay waxaa dambeeya Qiyaame, Xisaab, Abaalmarin iyo Ciqaab kuwa xadgudb een Eebe ka yaabin, waxayna ku waari Naar daran oon wax wanaagsan oo la cabbo iyo Hurdo iyo Raaxo midna lahayn, Eebana cidna ma dulmiyo, ee iyagaa is dulmiyay.

Qataada wuxuu yidhi: (Nagaanshaha Sanooyinka) waa waxaan dhammaanhaynin, markuu mid tagaba midbaa iman.

- 28. Waxayna beeniyeen Aayaadkannaga**
- 29. Wax walbana waxaan ku koobnay Kitaab**
- 30. Ee dhadhamiya Caddibaad Gaalooy waxaan caddibaad ahayn idiin kordhinmaynee**
- 31. Kuwa Eebe ka dhawrsada waxay leeyihiin liibaan**
- 32. Beero iyo Cinabyana way heli**
- 33. Waxayna Guursan Haween da'yar oo isle eg**
- 34. Waxayna heli Cabbid wanaagsan**
- 35. Jannada kuma dhexmaqlaan hadal macna la'aan ah iyo is beenin midna**
- 36. Waa abaalmarin Eebe uu siiyay oo ku filan**
- 37. Eebaha Samada iyo Dhulka iyo waxa u dhexeeya waa Allaha Raxmaan ah, Hadal wax ku soocelinna ma jiro (Qiyaamada)**
- 38. Maalinta Jibriil iyo Malaa'igtu Saf istaagi wax hadli ma jiro Ruux Eebe idmo mooyee oo Hadal xaq ah ku hadla**
- 39. Maalintaasi waa sugantahay ee Ruuxii doona Eebe xaggiisa meeluu ku noqdo ha ka samaysto**
- 40. Waxaannu idiinka digaynaa Caddibaad dhaw Maalinta uu arki Ruux walba waxay Gacmihiisu hor marsadeen, Gaalkuna uu dhihi Shallaytadaydee maan Carro noqdo.**

Qur'an 78: 1-40

Sharaxda Suurrada (3)

Eebe wuxuu ku dhaartay Malaa'igta siduu wax badan khalqigiisa ugu dhaartay in Qiyaamadu tahay wax sugan ruuxii rumeeyana ee xaq raaca uu ugu abaalmariyo Janno iyo wanaag.

Maalinta Qiyaame iyo dhibaataadeedana waa in Ruuxii Caqli leh u darbadaa, illeen waa Maalin xaq ah, ruux walbana wuu arki wuxuu hor marsaday, calaa calna uusan wax taraynin ee camal wanaagsan wax taro.